

Penerima Anugerah Khas Maulidur Rasul buktikan status OKU bukan halangan

KUBANG PASU - Pelajar Doktor Falsafah (PhD) Pengajian Antarabangsa, Universiti Utara Malaysia (UUM), Meor Muhammad Afif Aiman Abu Bakar, 31, dipilih sebagai penerima Anugerah Khas Maulidur Rasul sempena Majlis Sambutan Maulidur Rasul SAW Peringkat Negeri Kedah Selasa lalu.

Meor Muhammad Afif Aiman berkata, status orang kurang upaya (OKU) membuktikan kekurangan diri bukanlah halangan untuk aktif dalam aktiviti kemasyarakatan dan kepimpinan.

Katanya, penglibatan dalam kedua-dua aktiviti itu bermula sejak beliau menjadi ahli Majlis Perwakilan Pelajar (MPP) UUM pada 2011 ditambah pula dengan sokongan

bapanya sebagai pensyarah Institut Pendidikan Guru (IPDA) Kampus Darulaman yang turut aktif aktiviti kemasyarakatan.

"Saya bersyukur dipilih oleh kerajaan Kedah menerusi Jabatan Hal Ehwal Agama Islam Negeri untuk menerima anugerah tersebut secara dalam talian.

"Ia adalah satu pengiktirafan dan amanah besar untuk saya meneruskan agenda yang dibawa dalam melahirkan lebih ramai pemimpin muda khususnya dalam kalangan OKU," katanya di sini pada Ahad.

Menurutnya, anugerah yang diterima itu juga sangat istimewa kerana ia mendapat perkenan Sultan Kedah, Sultan Sallehuddin Sultan Badlishah.

"Kerja keras dan komitmen yang saya beri untuk membantu masyarakat dan anak-anak muda tanpa mengira penat lelah serta

wang ringgit sememangnya berbaloi dengan penganugerahan ini. "Saya anggap anugerah ini juga adalah rezeki di atas kelahiran cahaya mata pertama sejak mendirikan rumah tangga pada tahun lalu," katanya.

Meor Muhammad Afif Aiman menambah, beliau mula bergiat aktif dalam perjuangan dan pembangunan sahiah khususnya untuk komuniti OKU setelah menerima Anugerah Nadi Negara 2017 dan kini merupakan Pengerusi Tetap Majlis Belia OKU Kebangsaan (MBOKU) dan merupakan Presiden MBOKU Kedah.

"Saya juga Pengasas Persatuan Mahasiswa Istimewa (Permai) di Jabatan Hal Ehwal Pelajar mandangkan ketika itu tiada persatuan pelajar untuk OKU di UUM, seterusnya menubuhkan badan bukan kerajaan (NGO)



Meor Muhammad Afif Aiman (kiri) merupakan pengasas Persatuan Mahasiswa Istimewa (Permai) di Jabatan Hal Ehwal Pelajar UUM.

Permai Kebangsaan yang melibatkan pelajar universiti dan alumni di seluruh negara terdiri daripada OKU," katanya yang merupakan OKU *short limb gait* dan telah menjalani *correctional operation* April lalu.

Menjadikan Nabi Muhammad

SAW sebagai idola dalam kepimpinan, beliau yang juga Felo Bersekutu di Institut Kecemerlangan Pengajian Baitulmaqdis (IEIS) berkata, seorang pemimpin hebat adalah pemimpin yang mampu melahirkan lebih ramai pemimpin.